

## **HAA MAY HUSTONG ADLAW SA PAGSIMBA SABADO BA O DOMINGO? NGANONG NABALHIN MAN SA DOMINGO NGA SA MGA JUDIO SABADO MAN?**

FROM: BEN MALINAO

Atong hinumduman nga ang Biblia naglangkob kini sa duha ka kasabotan (two covenants), ang Daang Tugon ug ang Bag-ong Tugon. Mao nga gikinahanglan gayod nga masayran nato pag-ayo ang connection niining duha ka kasabotan (the old & the new) aron masabtan nato pag-ayo ang function niining duha ka kasabotan ug pinaagi niini masabtan pag-ayo nimo ang akong tubag sa imong pangutana. Ang Daang Tugon naglangkob kini sa mga Balaod ni Moises ug sa mga sinulat sa mga propeta. Ug sumala sa Lucas 16:16 ang Balaod ni Moises ug ang mga sinulat sa mga propeta hangtod lamang sa panahon ni Juan nga Magbubunyag.

**Lucas 16:16(MBB) “Ang Balaod ni Moises ug ang mga sinulat sa mga propeta hangtod lamang sa panahon ni Juan nga Magbubunyag. Sukad niadto gisangyaw ang Maayong Balita mahitungod sa Gingharian sa Dios, ug makigbisog ang tagsatgsa ka tawo pagsulod niini.”**

Ang unang bahin sa maong bersikulo nag-ingon nga **“Ang Balaod ni Moises ug ang mga sinulat sa mga propeta hangtod lamang sa panahon ni Juan nga Magbubunyag.”** Nganong kutob ra man sa panahon ni Juan nga Magbubunyag? Tungod kay human sa ministry ni Juan Magbubunyag si Jesus naman ang nagministry. Siya na ang nagwali mismo mahitungod Maayong Balita sa Gingharian sa Dios. Mao nga miingon ang ikaduhang bahin sa maong bersikulo **“Sukad niadto gisangyaw ang Maayong Balita mahitungod sa Gingharian sa Dios... Kini nagpasabot nga ang paagi sa Dios aron himoon ang tawo nga matarong atubangan sa Dios dili na pinaagi sa Balaod ni Moises kondili pinaagi na sa pagtuo kang Jesus. Mao kini ang Maayong Balita. Kini nagpasabot nga si Cristo mao ang kataposan sa Balaod.**

**Roma 10:4(MBB) “Kay si Cristo mao ang kataposan sa Balaod, aron ang tawo himoong matarong sa Dios pinaagi sa pagtuo.”** Kini nagpasabot nga ang paagi sa Dios aron himoon ang tawo nga matarong atubangan sa Dios dili na pinaagi sa Balaod ni Moises kondili pinaagi na sa pagtuo kang Jesus. Nagpasabot nga ang effectiveness sa Balaod ni Moises dili hangtod sa hangtod kondili hangtod lang kini kon wala pa si Cristo. Kini nagpasabot nga sa dihang miabot na si Jesus, ang tinuod nga gilandongan o gihulagwayan sa maong mga halad nga mananap sa Daang Tugon nga nasulat sumala sa Balaod ni Moises natapos ang maong mga halad kay miabot naman ang gilandongan niini nga mao si Jesus. Mao nga ang Balaod sa mga Judio gitawag kini nga landong lamang sa maayong mga butang nga umaabot.

**Hebreo 10:1(MBB) “Ang Balaod sa mga Judio dili hingpit ug dili sibo nga sumbanan sa tinuod nga mga butang. Landong lamang kini sa maayong mga butang nga umaabot...”** Ang pag-ingon **“Ang Balaod sa mga Judio”** kini nagpasabot sa Balaod ni Moises kon Kasugoan. Ang pag-ingon **“Ang Balaod sa mga Judio dili hingpit”** kini nagpasabot nga “ang Balaod sa mga Judio” dili pa gayod na siya mao. Naa pay moabot nga mas maayo pa nga maoy gilandongan o gihulagwayan niini. Mao nga miingon gayod ang bersikulo **“Ang Balaod sa mga Judio dili hingpit ug dili sibo nga sumbanan sa tinuod nga mga butang. Landong lamang kini sa maayong mga butang nga umaabot...”** Ang pag-ingon **“Landong lamang kini sa maayong mga butang nga umaabot...”** kini nagpasabot nga naghulagway lamang kini sa mahitabo sa umaabot.

**Hebreo 7:19, 22(MBB) “Kay ang Balaod ni Moises dili makahingpit, ug giilisan kini ug usa ka mas maayong paglaom nga makapaduol kanato sa Dios. (22)Ang maong kalainan naghimo usab kang Jesus nga pasalig sa usa ka mas maayo nga kasabotan.”**

## Ang BIBLIA May Tubag

---

Ang bersikulo 19 nag-ingon “**Kay ang Balaod ni Moises dili makahingpit, ug giilisan kini ug usa ka mas maayong paglaom nga makapaduol kanato sa Dios.**” Kini nagpasabot gayod kanato nga ang Balaod ni Moises kon Kasugoan dili pa gayod to mao. Mao nga kinahanglan kini nga ilisan kon moabot na ang gilandongan niini nga mao si Jesus. Si Jesus mao ang mas maayo natong paglaom aron siguro gayod kitang makaduol sa Dios. Mao kini ang giingon sa bersikulo 19 nga nag-ingon “**Kay ang Balaod ni Moises dili makahingpit, ug giilisan kini ug usa ka mas maayong paglaom nga makapaduol kanato sa Dios.**” Mao nga sa bersikulo 22 naghigut nga ang kasabotan nga iya ni Jesus mas maayo nga kasabotan. Nag-ingon ang bersikulo 22 “**Ang maong kalainan naghimo usab kang Jesus nga pasalig sa usa ka mas maayo nga kasabotan.**” Ug higisgutan usab kini sa kapitulo 8 sa Hebreo.

Hebreo 8:6-7, 13(MBB) “**Apan sumala sa nahitabo, gihatagan si Jesus ug parianong katungdanan nga mas halangdon pa kaayo kay sa ila, ingon nga ang kasabotan nga iyang gihikay tali sa Dios ug sa tawo mas maayo, tungod kay pinasikad man sa mga saad sa labi pang maayong mga butang. (7) Kon wala pay sayop kadtong unang kasabotan, wala unta kinahanglana ang ikaduha. (13) Sa paghisgot mahitungod sa usa ka bag-ong kasabotan, ang Dios naghimong daan sa una; ug ang tanan nga nagkadaan ug nagkadunot mahanaw sa dili madugay.**”

Ang bersikulo 6 nag-ingon “**...gihatagan si Jesus ug parianong katungdanan nga mas halangdon pa kaayo kay sa ila, ingon nga ang kasabotan nga iyang gihikay tali sa Dios ug sa tawo mas maayo, tungod kay pinasikad man sa mga saad sa labi pang maayong mga butang.**” Kini dayag nga nagsulti kanato nga ang kasabotan nga gihimo ni Jesus mas maayo gayod kay sa kasabotan o sa mga Balaod ni Moises.

Ang bersikulo 7 nag-ingon “**Kon wala pay sayop kadtong unang kasabotan, wala unta kinahanglana ang ikaduha.**” Ang pag-ingon nga “**Kon wala pay sayop kadtong unang kasabotan**” kini nagpasabot nga ang unang kasabotan dili pa gayod to sakto, dili pa gayod to mao. Duna pa toy kulang tungod kay landong lamang kadto sa mahitabo sa umaabot nga mao ang pag-abot ni Jesus. Mao nga gikinahanglan ang ikaduhang kasabotan, nga mao ang kasabotan nga iya ni Jesus. Mao nga sa kapitulo 12 sa Hebreo naghigut nga si Jesus mao ang tigpataliwala sa bag-ong kasabotan.

Hebreo 12:24(MBB) “**Miduol kamo kang Jesus nga maoy tigpataliwala sa bag-ong kasabotan, ug ngadto sa gisablig nga dugo nga nagpaila sa mas maayong mga butang kay sa dugo ni Abel.**”

Mga Hebreohanon 12:24(AB) “**Ug kang Jesus, ang tigpataliwala sa usa ka bag-ong pakigsaad, ug sa sinablig nga dugo nga nagasulti sa labi pa ka maayong pulong kay sa dugo ni Abel.**” Ang unang bahin sa maong bersikulo nag-ingon “**Miduol kamo kang Jesus nga maoy tigpataliwala sa bag-ong kasabotan**” kini dayag kaayo nga nagpasabot kanato nga karon sa bag-ong tugon, panahon sa Christian era, si Jesus mao ang atong tigpataliwala ngadto sa Dios kay naghalad man siyag dugo alang sa mga sala sa mga tawo nga iyaha gayod nga kaugalingong dugo. Dili dugo sa mga mananap nga maoy gigamit sa panahon ni Moises ug sa Daang Tugon kondili iyaha gayod nga kaugalingong dugo mao ang gihalad. Mao nga ang iyang kasabotan mas maayo kaayo kay sa unang kasabotan. Mao nga miingon ang ikaduhang bahin sa bersikulo nga “**ngadto sa gisablig nga dugo nga nagpaila sa mas maayong mga butang kay sa dugo ni Abel.**” Sa dihang gipatay si Abel ni Cain sumala sa Genesis 4:10 nagsulti kanato nga ang tingog sa dugo ni Abel nadungog sa Dios gikan sa yuta. Kini nagpasabot nga tungod kay matarong si Abel, ang iyang kamatayon bililhon sa Dios. Nan, kon bililhon alang sa Dios ang dugo ug kamatayon ni Abel, unsa pa kaha ang dugo nga giula ug ang kamatayon ni Jesus? Mao nga miingon ang bersikulo “**Ug kang Jesus, ang tigpataliwala sa usa ka bag-ong pakigsaad, ug sa sinablig nga dugo nga nagasulti sa labi pa ka maayong pulong kay sa dugo ni Abel.**” Kini nagpasabot gayod nga ang kasabotan nga iya ni Jesus mao ang pinaka-maayong kasabotan tungod kay giulaan man kini sa bililhong dugo sa Anak sa Dios.

**Hebreo 9:15(MBB)** “Tungod niini si Cristo mao ang naghimo sa usa ka bag-ong kasabotan, aron kadtong gitawag sa Dios makadawat sa walay kataposang mga panalangin nga gisaad sa Dios. Mahimo kini tungod kay may kamatayon man nga nagluwas sa mga tawo gikan sa mga sala nga nahimo nila samtang ubos pa sila sa unang kasabotan.” Kini nagpasabot nga sa pag-abot na ni Jesus miabot ang gitawag nga bag-ong kasabotan. Ug si Jesus ang tigpataliwala sa maong kasabotan. Mao nga dili ka matingala nga sa pag-abot ni Cristo gisupak niya ang adlaw igpapahulay sa mga Judio.

**Mateo 12:1-8(MBB)** “Usa niana ka Adlawng Igpapahulay, naglakaw si Jesus agi sa kaumahan sa trigo. Ang iyang mga tinun-an gigutom, busa nangutlo silag mga uhay sa trigo ug nangukit niini. (2)Sa pagkakita niini sa mga Pariseo, miingon sila kang Jesus, ‘Tan-awa ra, supak sa atong Balaod nga ang imong mga tinun-an maghimo niini sa Adlawng Igpapahulay. (3)Si Jesus mitubag, ‘Wala ba diay kamo makabasa sa gibuhat ni David sa dihang gigutom siya ug ang iyang mga kauban? (4)Miadto siya sa balay sa Dios, ug mikaon siya ug ang iyang mga kauban sa pan nga gihalad ngadto sa Dios, bisag supak sa Balaod nga mangaon sila niadtong pan, kay ang pari man lamang ang gitugutan sa pagkaon niini. (5)O wala ba diay kamo makabasa sa Balaod ni Moises, nga sa matag Adlawng Igpapahulay ang mga pari sulod sa Templo naglapas man sa Balaod sa Adlawng Igpapahulay apan wala sila makasala? (6)Sultihan ko kamo nga dinhi aniay labaw pa kay sa Templo. (7)Kon kamo nakasabot pa lamang sa kahulogan niining bahina sa Kasulatan nga nag-ingon, ‘Dili ako gustog mga halad nga mananap, kondili kaluoy, dili unta ninyo pakasad-on ang mga tawo nga walay sala. (8)Kay ang Anak sa Tawo mao ang magbuot sa angayng buhaton sa Adlawng Igpapahulay.”

Ang bersikulo 1-2 nag-ingon “Usa niana ka Adlawng Igpapahulay, naglakaw si Jesus agi sa kaumahan sa trigo. Ang iyang mga tinun-an gigutom, busa nangutlo silag mga uhay sa trigo ug nangukit niini. (2)Sa pagkakita niini sa mga Pariseo, miingon sila kang Jesus, ‘Tan-awa ra, supak sa atong Balaod nga ang imong mga tinun-an maghimo niini sa Adlawng Igpapahulay.” Kini nagpamatuod kanato nga alang sa mga Judio bisan sa pagpangutlog uhay sa trigo ug pag-ukit niini gidili sa ilang Balaod nga gihimo panahon sa Adlawng Igpapahulay. Apan si Jesus dili supak sa gihimo sa iyang mga tinun-an. Uyon siya sa ilang gibuhat. Mao nga miingon siya sumala sa bersikulo 3-8 “Wala ba diay kamo makabasa sa gibuhat ni David sa dihang gigutom siya ug ang iyang mga kauban? (4)Miadto siya sa balay sa Dios (nagpasabot sa Templo), ug mikaon siya ug ang iyang mga kauban sa pan nga gihalad ngadto sa Dios, bisag supak sa Balaod nga mangaon sila niadtong pan, kay ang pari man lamang ang gitugutan sa pagkaon niini. (5)O wala ba diay kamo makabasa sa Balaod ni Moises, nga sa matag Adlawng Igpapahulay ang mga pari sulod sa Templo naglapas man sa Balaod sa Adlawng Igpapahulay apan wala sila makasala? (6)Sultihan ko kamo nga dinhi aniay labaw pa kay sa Templo. (7)Kon kamo nakasabot pa lamang sa kahulogan niining bahina sa Kasulatan nga nag-ingon, ‘Dili ako gustog mga halad nga mananap, kondili kaluoy, dili unta ninyo pakasad-on ang mga tawo nga walay sala. (8)Kay ang Anak sa Tawo mao ang magbuot sa angayng buhaton sa Adlawng Igpapahulay.” Kini nagpasabot nga si Jesus nagtudlo nga bisan pag adlaw igpapahulay kon ang iyang gibuhat makaayo sa tawo ug gikinahanglan gayod sa tawo nganong hikawan man nimo siya sa paghimo?

**Mateo 12:9-14 (MBB)** “Si Jesus mibiya niadtong dapita ug miadto sa usa sa mga sinagoga. (10)Didto may usa ka tawo nga kuyos ug kamot. May pipila usab ka tawo didto nga buot mopasangil nga si Jesus nagbuhat ug daotan; busa nangutana sila kaniya, ‘Supak ba sa atong Balaod ang pag-ayog masakiton sa Adlawng Igpapahulay? (11)Si Jesus mitubag, ‘Unsa may inyong buhaton kon kamo may karnero nga mahulog sa usa ka lawom nga gahong sa Adlawng Igpapahulay? Dili ba ninyo kuhaon kini? (12)Mas dako pag bili ang tawo kay sa karnero! Busa ang atong Balaod nagtugot kanato sa pagtabang kang bisan kinsa sa Adlawng Igpapahulay. (13)Unya giingnan niya ang tawo, ‘Ituy-od ang imong kamot. Ug iyang gituy-od, ug naayo kini. (14)Unya nanlakaw ang mga Pariseo ug naglaraw sa pagpatay kang Jesus.”

## Ang BIBLIA May Tubag

---

Kini naghisgut mahitungod sa tawo nga kuyos ug kamot nga gusto ni Jesus nga iyang ayohon, apan supak niini ang mga Pariseo. Mao nga ilang gibitik si Jesus pinaagi sa usa ka pangutana nga nag-ingon **“Supak ba sa atong Balaod ang pag-ayog masakiton sa Adlawng Igpapahulay?”** Apan si Jesus miingon kanila **“Unsa may inyong buhaton kon kamo may karnero nga mahulog sa usa ka lawom nga gahong sa Adlawng Igpapahulay? Dili ba ninyo kuhaon kini? (12)Mas dako pag bili ang tawo kay sa karnero! Busa ang atong Balaod nagtugot kanato sa pagtabang kang bisan kinsa sa Adlawng Igpapahulay. (13)Unya giingnan niya ang tawo, ‘Ituy-od ang imong kamot. Ug iyang gituy-od, ug naayo kini. (14)Unya nanlakaw ang mga Pariseo ug naglaraw sa pagpatay kang Jesus.”** Kini nagpasabot nga si Jesus nagtudlo nga bisan pag adlaw igpapahulay kon kini makaayo sa tawo ug gikinahanglan gayod sa tawo nganong hikawan man nimo siya sa paghimo? Mao nga giayo gayod ni Jesus ang masakiton. Ug tungod kay dili man makadawat ang mga Pariseo sa prinsipyo ni Jesus mao kini ang hinungdan nga gidumtan siya pag-ayo sa mga kadagkoan sa mga Judio. Mao nga miingon ang bersikulo 14 **“Unya nanlakaw ang mga Pariseo ug naglaraw sa pagpatay kang Jesus.”** Kini dayag kaayo nga nagpasabot kanato nga ang mga tawo nga hilabihan ka fanatiko sa Adlawng Igpapahulay maoy nagpamatay kay Jesus.

**Lucas 13:10-17(MBB)** **“Usa niana ka Adlawng Igpapahulay nagtudlo si Jesus didto sa usa ka sinagoga. (11)Didto may babaye nga giyawaan ug tungod niini, nasakit siya sulod sa 18 ka tuig. Nagtikubo na siya ug dili na makatuyhad. (12)Sa pagkakita ni Jesus kaniya, miingon siya sa babaye, ‘Naayo na ikaw sa imong sakit! (13)Ug iyang gitapion ang iyang kamot sa babaye, ug dihadiha nakatuyhad siya ug gidayeg niya ang Dios. (14)Ang opisyal sa sinagoga nasuko nga si Jesus nag-ayo sa masakiton sa Adlawng Igpapahulay, ug miingon siya sa mga tawo, ‘May unom ka adlaw nga kita makatrabaho. Anhi kamo nianang mga adlaw kon gusto kamong mamaayo, apan dili sa Adlawng Igpapahulay! (15)Mitubag ang Ginoo kaniya, ‘Mga tigpakaaron–ingnon kamo! Sa Adlawng Igpapahulay bisan kinsa kaninyo mobadbad sa inyong baka kun asno gikan sa kuwadra ug dad-on ninyo kini ngadto sa gawas aron paimnon. (16)Karon, aniay kaliwat ni Abraham nga gipaantos ni Satanas sulod na sa 18 ka tuig; dili ba siya mahimong ayohon sa Adlawng Igpapahulay? (17)Naulaw ang tanan mga kaaway sa pagkadungog nila sa tubag niya, samtang nalipay ang tanang mga tawo sa kahibulongang mga buhat ni Jesus.”**

Kini naghisgut mahitungod sa usa ka babaye nga giayo ni Jesus apan nasuko ang opisyal sa sinagoga tungod kay usa man kadto ka adlawng igpapahulay. Apan miingon si Jesus kaniya sumala sa bersikulo 15-16 **‘Mga tigpakaaron–ingnon kamo! Sa Adlawng Igpapahulay bisan kinsa kaninyo mobadbad sa inyong baka kun asno gikan sa kuwadra ug dad-on ninyo kini ngadto sa gawas aron paimnon. (16)Karon, aniay kaliwat ni Abraham nga gipaantos ni Satanas sulod na sa 18 ka tuig; dili ba siya mahimong ayohon sa Adlawng Igpapahulay? (17)Naulaw ang tanan mga kaaway sa pagkadungog nila sa tubag niya, samtang nalipay ang tanang mga tawo sa kahibulongang mga buhat ni Jesus.”** Kini dayag nga nagpasabot kanato nga ang tawong magpakamatarong pinaagi kunohay sa pagtuman sa balaod sa adlawng igpapahulay mga tigpakaaron-ingnon. Tungod kay sila mismo wala man gani makatuman sa maong mga balaod mahitungod sa Adlawng Igpapahulay. Busa naulawan ang mga kaaway ni Jesus tungod kay sila mismo wala man gani makatuman niini. Kini nagpasabot nga si Jesus nagtudlo nga bisan pag adlawng igpapahulay kon kini makaayo sa tawo ug gikinahanglan gayod sa tawo nganong hikawan man nimo siya sa paghimo? Mao nga giayo gayod ni Jesus ang masakiton.

**Juan 5:8-11, 15-18(MBB)** **“Si Jesus miingon kaniya, ‘Tindog, dad-a ang imong gihigdaan ug lakaw. (9)Ug dihadiha naayo siya ug gidala niya ang iyang gihigdaan ug milakaw. Nahitabo kini sa Adlawng Igpapahulay, (10)busa giingnan sa mga Judio ang tawo nga naayo, ‘Adlawng Igpapahulay karon, ug supak sa atong Balaod ang pagdala sa imong gihigdaan. (11)Siya mitubag, ‘Giingnan ako sa tawo nga nag-ayo kanako, ‘Dad-a ang imong gihigdaan ug lakaw. (15)Unya milakaw ang tawo ug misugilon sa mga kadagkoan sa mga Judio nga si Jesus**

diay maoy nag-ayo kaniya. (16) Tungod niini, misugod ang mga Judio paglutos kang Jesus, kay giayo man niya ang tawo sa Adlawng Igpapahulay. (17) Busa si Jesus mitubag kanila, “Ang akong Amahan nagbuhat hangtod karon ug ako usab nagbuhat. (18) Tungod niini misamot hinuon ang tinguha sa mga kadagkoan sa mga Judio sa pagpatay kaniya, sanglit dili lamang kay gilapas niya ang Balaod sa Adlawng igpapahulay, kondili miingon pa gayud siya nga ang Dios iyang Amahan, ug sa ingon niini gipakasama niya ang iyang kaugalingon sa Dios.”

Kini dayag kaayo nga nagpasabot kanato nga sa balaod sa mga Judio bisan sa pagpas-an ug higdaanan panahon sa adlawng igpapahulay gidili. Apan gisupak kini ni Jesus. Mao nga pagkahibalo sa mga kadagkoan sa mga Judio niini misugod sila sa paglutos kang Jesus ug paglaraw sa pagpatay kaniya. Mao kini ang giingon sa bersikulo 16 ug 18 “Tungod niini, misugod ang mga Judio paglutos kang Jesus, kay giayo man niya ang tawo sa Adlawng Igpapahulay. (18) Tungod niini misamot hinuon ang tinguha sa mga kadagkoan sa mga Judio sa pagpatay kaniya, sanglit dili lamang kay gilapas niya ang Balaod sa Adlawng igpapahulay, kondili miingon pa gayud siya nga ang Dios iyang Amahan, ug sa ingon niini gipakasama niya ang iyang kaugalingon sa Dios.”

Nag-ingon ang unang bahin sa bersikulo 18 “Tungod niini misamot hinuon ang tinguha sa mga kadagkoan sa mga Judio sa pagpatay kaniya, sanglit dili lamang kay gilapas niya ang Balaod sa Adlawng igpapahulay...kini klaro kaayo nga nagsulti kanato nga gisupak ni Jesus ang balaod sa adlawng igpapahulay. Mao nga nagtudlo si Jesus nga siya mao ang atong kapahulayan. Kon gusto kang makapahulay kinahanglan kang moduol kaniya. Mao nga sauna ang adlaw nga igpapahulay mao ang ikapitong adlaw sa semana, apan sa bag-ong tugon ang atong kapahulayan mao na Cristo.

**Hebreo 4:4-9(AB)** “Kay sa usa ka dapit siya nagsulti mahitungod sa ikapito ka adlaw sa ingon niini nga paagi, ‘Ug sa ikapito ka adlaw ang Dios mipahulay gikan sa iyang tanang mga buhat. (5)Ug usab niining dapita, siya nag-ingon, ‘Dili gayod sila makasulod sa akong kapahulayan. (6)Busa, sanglit aduna may pipila nga managpakasulod pa niini, ug sanglit kadtong mga gikawalihan kanhi sa Maayong Balita wala man managpakasulod niini tungod sa ilang pagkamasupilon, (7)nagtudlo siya pag-usab ug usa ka adlaw, ang ‘Karong adlaw,’ diha sa iyang pagsulti pinaagi kang David sa nakalabay na ang dugayng panahon, sa mga pulong nga gikutlo sa unahan, ‘Karong adlaw,’ inigkadungog ninyo sa iyang tingog, ayaw ninyo pagahia ang inyong mga kasingkasing. (8)Kay kon si Josue nakahatag pa kanilag pahulay, ang Dios na lang unta maghisgot ug lain pang adlaw. (9)Busa nagapabilin pa diay ang usa ka kapahulayan nga gitagana alang sa mga tawo sa Dios.” Kining Hebreo 4:4-9 naghigut kini mahitungod sa Dios nga mipahulay gikan sa iyang tanang mga buhat sa ikapitong adlaw. Dinhi gibasi ang pagtulun-an mahitungod sa adlawng igpapahulay. Apan sumala sa bersikulo 7 nagsaad pa ang Dios ug laing adlaw nga gitawag niyang ‘**Karong Adlaw**’ (Today), nag-ingon ang bersikulo 7 “...nagtudlo siya pag-usab ug usa ka adlaw, ang ‘Karong adlaw,’ diha sa iyang pagsulti pinaagi kang David sa nakalabay na ang dugayng panahon, sa mga pulong nga gikutlo sa unahan, ‘Karong adlaw,’ inigkadungog ninyo sa iyang tingog, ayaw ninyo pagahia ang inyong mga kasingkasing.” Ang kataposang bahin sa maong bersikulo nag-ingon sa mga pulong nga gikutlo sa unahan ‘**Karong adlaw,**’ inigkadungog ninyo sa iyang tingog, ayaw ninyo pagahia ang inyong mga kasingkasing.’ Kini nagpasabot nga kining laing adlaw nga gitawag sa Dios nga ‘**Today**’ (Karong Adlaw), lahi siya kaayo nga matang sa adlaw kay mosulti siya nga adlaw. Motingog siya nga adlaw. Nan, kinsa man kining adlaw nga mosulti, nga kon ikaw mamati ug mopatuo kaniya sa kinasingkasing gayod makabaton kag kapahulayan? Ang tubag anaa sa Salmo 118:22, 24.

**Salmo 118:22, 24(MBB)** “Ang bato nga gisalikway sa mga magtutukod kay walay hinungdan, nahimo hinuon nga labing importanteng bato... (24)Mao kini ang adlaw nga gibuhay sa Ginoo; maglipay ug magmaya kita niini.”

## Ang BIBLIA May Tubag

---

Ang bersikulo 22 nag-ingon “**Ang bato nga gisalikway sa mga magtutukod kay walay hinungdan, nahimo hinuon nga labing importanteng bato.**” Kining bersikulo 22 naghigutang kini mahitungod kang Jesus, ang bato nga gisalikway sa mga Judio, apan mao diay ang labing importanteng bato. Mao nga miingon ang bersikulo 24 “**Mao kini ang adlaw nga gibuhat sa Ginoo; maglipay ug magmaya kita niini.**” Kini nagpasabot nga si Jesus gitawag nga adlaw, ‘**Mao kini ang adlaw.**’ Siya ang gitawag sa Hebreo 4:7 nga adlaw nga motingog, nga kinahanglan kita mamati sa iyang isulti. Mao nga dili ka matingala nga pag-abot ni Jesus miingon siya “**Umari kanako, kamong tanan nga nabudlay ug nabug-atan, ug papahulayon ko kamo.**”

**Mateo 11:28-29(AB)** “**Umari kanako, kamong tanan nga nabudlay ug nabug-atan, ug papahulayon ko kamo. (29)Isangon ninyo ang akong yugo diha kaninyo, ug pagtuon kamo gikan kanako; kay ako maaghop ug mapaubsabnon sa kasingkasing, ug makakaplag kamog pahulay alang sa inyong mga kalag.**”

Kini nagpasabot gayod kanato nga ang kapahulayan dili na ang ikapitong adlaw kondili si Jesus na ang atong kapahulayan. Siya ang adlaw nga diin makapahulay ang atong mga kalag. Mao nga sauna ang adlaw nga igpapahulay mao ang ikapitong adlaw sa semana, apan sa bag-ong tugon ang atong kapahulayan mao na Cristo.

**Colosas 2:16(MBB)** “**Busa ayaw ninyo itugot nga may magsaway kaninyo sa inyong kan-on o ilimnon, o bahin sa mga adlaw nga balaan, o sa pangilin sa bag-ong bulan, o bahin sa Adlaw nga Igpapahulay. (17)Kining tanan mga landong lamang sa mga butang nga umaabot, apan ang katumanan mao si Cristo.**”

Kini dayag kaayo nga nagpasabot kanato nga ang Adlawng Igpapahulay sa Daang Tugon landong lamang kadto sa butang nga umaabot, ug si Cristo mao ang katumanan niini. Mao nga pinaagi kaniya dili lang ka makapahulay sa ikapitong adlaw kondili makapahulay na gayod ka sa tanang adlaw sa imong kinabuhi kon moduol ka lang kang Jesus ug moila kaniya nga Ginoo ug Manluluwas sa imong kinabuhi. Mao nga ang adlawng igpapahulay wala ibalhin sa laing adlaw kondili gibalhin diha ni Cristo kay siya man katumanan sa maong butang. Katong adlawng igpapahulay sa unang panahon landong lamang kadto, apan ang katumanan mao si Cristo. Mao nga ang adlawng igpapahulay wala ibalhin ni Jesus ug Domingo kondili bisan unsang adlaw pwede kanang makasimba sa Dios. Kay si Jesus naman mao ang atong kapahulayan. Mao nga ang mga tinun-an ni Jesus pwede sila magsimba bisan unsang adlaw, mao nga pwede silang magsimba o magtigom kada adlaw.

**Buhat 2:46-47(MBB)** “**Nagpadayon sila pagtigom kada adlaw didto sa templo, ug naghiusa sila pagpangaon uban sa masadya ug mapaubsanong kasingkasing didto sa ilang mga puloy-anan. (47)Gidayeg nila ang Dios ug gikahimut-an sila sa katawhan...**”

Kini nagpasabot lamang gayod kanato nga pwede mo magtigom aron sa pagdayeg sa Dios bisan unsang adlaw. Bisang unsang adlaw, bisan pag kada-adlaw basta ang imong gibuhat nakapahimuot lang sa Dios, nakasimba ka sa Dios. Mao kini ang kahulogan sa Biblia mahitungod sa pagsimba. Ang pagsimba dili lang alang sa adlawng Domingo, dili lang alang sa adlawng Sabado kondili bisan unsang adlaw. Bisang unang imong buhaton sa bisan unang adlaw basta nakapahimaya lang sa Dios, usa ka na ka pagsimba. Mao kini ang saktong kahulogan sa pagsimba kon Biblia ang atong basihan.

**Roma 12:1(MBB)** “**Busa, mga igsoon, tungod sa dakong kaluoy nga gipakita sa Dios kanato, hangyoon ko kamo sa pagtugyan sa inyong kaugalingon ngadto sa Dios, ingon nga buhing halad, balaan ug makapahimuot kaniya. Mao kini ang matuod nga pagsimba nga angay ninyong ihalad.**” Kini dayag kaayo nga nagsulti kanato kon unang saktong kahulogan sa pagsimba. ANYTHING YOU DO THAT PLEASES/GLORIFIES GOD IS AN ACT OF WORSHIP. Bisang unang imong himoon kon kini nakapahimuot ug makapahimaya sa Dios, usa ka na ka buhat sa pagsimba. Busa, bisang unsang adlaw pwede kang makasimba sa Dios. Mao nga akong balikon ang imong pangutana: ‘**HAA MAY HUSTONG ADLAW SA PAGSIMBA SABADO BA O DOMINGO?** Kon Biblia ang atong basihan bisang unang adlaw pwede kang makasimba sa Dios. Pulos na husto. **NGANONG NABALHIN MAN SA DOMINGO NGA SA MGA JUDIO SABADO MAN?** Kon Biblia ang atong basihan wala mabalhin sa adlawng Domingo kondili nabalhin diha ni Cristo. Mao nga pwede ka nang makasimba sa Dios bisang unang adlaw kay si Cristo naman ang atong kapahulayan.